



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**29. Kalenderwoche – ab 18. Juli 2010**

## Dor ledzde Ossi

Nee, nisch, dass isch mir jedzde werglisch greeßore Sorschn um unsorn Mischa machn däde - was dor Ballagg is! Nee, nisch direggd Sorschn! Dähr had ja bis jedzde genuch Lagg gemachd. Dähr Ballagg had sozusachn - nomen esd omen! - midm Ball jede Menge Lagg gemachd! Dähr muss keene Angsd ham, dassor nach seinor agdiefn Zeid als Fuballor off Harz Viere angewiesn is. Nee, das nisch! Abor de ganze Zeid ibor, wo jezde de Weldmeesdorschafd gewähns is, habsch misch irschendwie geärschord... odor gewunnord... odor habs nisch so rischdisch begriffn, was de Rebordor un de Zeidung so gesachd ham. Un ooch, was de Golleschn aus dor Nadsjonalmannschafd gesachd ham - ob se off unsorn Mischa vorzischdn kenn, odor ob se dähn sähr vormissn... odor ob se dähn als Gabidähn gahr nisch mähr ham wolln... - un was da so alles riebor geschwabbd is - aus dor Gerischdekische.

Un dann habsch misch gewunnord, wie se alle dähn Schweini gelohbd ham. So wie dähn Schweini ham de Rebordor in de ledzdn zähn Jahre dähn Ballagg nie gelohbd. Das had misch schon immor e bißl gewurmd. Dähr konnde loofn un machn un hindn un vorne de Bälle abfang... das had keenor eenor Wirdischung fiehr needisch embfundn! Un dann hab isch ooch immor dähn Eindrugg gehabbd, dass die annorn Schbielor gahr nisch so sähr versuchn dun, dähm Ballagg dähn Ball zuzuschbieln, damid dähr dann wie e Reschisöhr vordeeln kann. Isch hab misch immor gefrachd, ob die dähn nisch e bißl ins Lähre loofn lassn? Die annorn unsorn Mischa! Wann had dähr denne ma werglisch eene scheene Vorlache gegrishd, damiddor e Dohr machn kann?

Nascha, abor nu hab isch irschendwie doch begriffn - was da los is. Dor Mischa Ballagg is dor ledzde Ossi! Ja, dor ledzde Ossi im Haifischbeggn vom großn Fußballgeschäfd! Noch dazu eenor mid säggsischn Aggzend!

Es war ja ma eene Zeid, da had de Nadsjonahlmansschafd fasd nur noch aus Osis beschdandn. Nowodny, Jangor, Schneidor, Bode... - da is dor Olli Gahn fasd dor eenzische Wessi gewähsn! Das is vorbei! Jedzde hammse zwahr jede Mänge Migrandn dabei... - also, Wessis, die een ausländischn Andeel in de Gene ham... abor sonsd... - dor Renneh Adlor noch, abor dähr is ja kee Schbielor. Isch gloobe fasd, so offm Bladz da had unsor Mischa gahr nisch so sähr viel Freinde mähr. Un das had mor ehm immor irschendwie gemärgd. So gesähn - da hamm die werglisch bei dor Weldmeesdorschafd ohne dähn Mischa bessor zusamm geschbield. Weil se mähr unnornandor Freund warn. Dor Mischa is in de ledzdn Jahre - gloob isch - immor e bißl wie finfdes Rad am Waachn gewähsn. Obwohl dähr Gabidähn gewähsn is. Abor wie das ehm mid Scheffs is, die keenor so rischdisch lieb ham dud... - da duds nisch rischdisch hahrmoniern! Na, isch bin sähr geschbannd, wies nu jedzde weidorgehn dud... mid unsorm Mischa. Wenn isch dähr sein däde, dädsch mir meine eischne Nadsjonahlmansschafd machn. Abor ob das gehn däde?

**Eduard Sachsenmeyer**